



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

Glas Načelnika

POSljednja VIJEST!



Dragi moji sugrađani!

Moram najprije pojasniti šta sam htio reći naslovom „posljednja vijest“... U novinama se često upotrebljava ova kovanica, i označava vijest koja se mora objaviti, unijeti u novinu, najčešće dnevnu, makar da je sadržaj lista zaključen, tj. zamalo se počelo sa štampom.

Sadržaj našeg mjesečnika, koji upravo čitate, odnosi se na septembar, a meni ste dužnost prvog čovjeka našeg lijepog i dragog grada ponovo povjerali, u oktobru: ne mogu

propustiti priliku da vam se i ovim putem zahvalim!

Dali ste mi gotovo dva puta više glasova nego drugoj dvojici stranačkih kandidata zajedno! To shvatam na dva načina: prvo, priznanje za moj dosadašnji rad, i drugo, povjerenje, odnosno vaše očekivanje, da ću tako i nastaviti!

Nastavit ću još bolje, vidjet će se!

Zajedno s vama, naravno!

Naš će Bosanski Petrovac postajati ljepši i ugodniji za život iz mjeseca u mjesec!

*Srdačno,
Zlatko Hujic*

30. septembar 2016. – dan za ponos i pamćenje!

OTKRIVEN SPOMENIK „PETROVAČKIM VELIKANIMA“

Ulaz u zgradu Općine krase zajednički vječnik Mersadu Berberu, Jovanu Bijeliću, Ahmetu Hromadžiću i Skenderu Kulenoviću

Spomenik „Petrovačkim velikanima“ otkriven je 30. septembra, pred ulazom u zgradu Općine, uz svečanost kojoj su prisustvovali članovi porodica Ahmeta Hromadžića i Mersada Berbera, velik broj sugrađana i gostiju, među kojima novinar i pisac Vehid Gunić i glumac Josip Pejaković. Na ovaj način, zavičaj se na dostojan način prisjetio, i kiparskim vječnikom ovjekovječio svoje slikare Mersada Berbera i Jovana Bijelića, i pisce Ahmeta Hromadžića i Skendera Kulenovića.

Petrovački velikani su doživjeli slavu u cijelom svijetu. Za sve ono što su učinili, promovirajući dušu našeg čovjeka, spomenik je podignut i trajno će svjedočiti o njihovim ljudskim veličinama i stvaralačkoj genijalnosti.

Velikani kulture svjetskih razmjera, glasnici mira i suživota, neodvojivi su dio svog zavičaja, što je tokom programa bilo popraćeno zvučnim zapisom „Četiri petrovačke karijatide“ autora Milenka Miše Marića, još jednog istaknutog petrovačkog pisca: „...Jovan, Skender, Ahmet i Mersad jedna su petrovačka porodica, čije su sudbine neraskidivo vezane i govore podjednako o njima i gradu koji ih je rodio...“

Ovim povodom lijepo misli o našim velikanima kazali su načelnik Zlatko Hujic i Vehid Gunić.

Autor spomenika je akademski slikar Zlatko Dizdarević, iz Velike Kladuše.



Svečano otkrivanje spomenika „Petrovačkim velikanima“



Poseban naklon i odavanje poštovanja Josipa Pejakovića



Odjekuju riječi Miše Marića: „...da sjećanja na Jovana, Skendera, Ahmeta i Mersada nikad ne izbljede...“

OTVOREN TRŽNI CENTAR „BINGO“

Nekadašnji „Novitet“ oživio u potpuno novom ruhu

Nakon otkrivanja spomenika „Petrovačkim velikanima“, 30. septembra, veličanstveni dan u našem gradu nastavio se otvaranjem supermarketa „Bingo“ (sa raznovrsnim pratećim sadržajima kao restoran, igraonica za djecu, parking...).

Danas je na ovom prostoru, od nekih šest hiljada kvadratnih metara otvoreno 50 radnih mjesta – samo u „Bingu“! Što se tiče pogona „Alma Ras“, tu će uskoro biti otvoreno još toliko.

Dan za ponos i pamćenje – 30. septembar 2016!

Simboličnim presjecanjem vrpce, novoootvoreni market su na upotrebu predali Edin Ibrahimović, izvršni direktor kompanije „Bingo“ za biznis-operacije i Zlatko Hujić, načelnik Opštine.

„Iznimno smo ponosni što smo ponovo u Krajini. Ovdje imamo iskustva sa kupcima, kupci su sa nama! Petrovac je jedna mala opština koja nas zaista treba, vidimo to i po samoj posjeti; ali, i nama je potreban Bosanski Petrovac! U narednom periodu „Alma Ras“ će otvoriti svoj proizvodni pogon, tako da će ova sredina zaista oživjeti“ – kazala je Tatjana Paunovski, rukovodilac Marketing-službe kompanije „Bingo“.

Drugačiji ugođaj, elegantan i moderan ambijent, bogat asortiman i „Bingove“ dobro poznate cijene oduševili su bosanskopetrovačke kupce.

„Naš grad je odavno zaslužio ovako lijep i moderan trgovački centar. Kad se otvori proizvodni pogon „Alma Ras“, imat ćemo stotinu radnih mjesta. Jedan čovjek kada se zaposli – to je uspjeh, a kamoli stotinjak ljudi“ – riječi su načelnika Hujića. Na dan otvorenja, „Bingo“ je za svoje kupce pripremio različite pogodnosti, akcijsku ponudu, te poklon-pakete, promocije i degustacije sa svojim poslovnim partnerima u kojima su zaista mogli uživati brojni kupci. Asortiman „Binga“ zadovoljava sve potrebe jednog domaćinstva. U ponudi je namještaj i

bijela tehnika, a osim širokog asortimana prehrane, hemije, kozmetike, u super ponudi imaju i tekstil.

Pored supermarketa, otvoren je i restoran, sa bogatim gastronomskim ponudama, a na oduševljenje naših najmlađih sugrađana otvorena je i igraonica, kako bi se ostvario potpuni porodični ugođaj i ispunile potrebe svake porodice i svakog pojedinca koji posjeti „Bingo“.



Svečano presijecanje vrpce (drugi s desna načelnik Hujić, Tatjana Paunovski rukovodilac Marketing-službe kompanije „Bingo“, Edin Ibrahimović-izvršni direktor za biznis-operacije)



Bosanskopetrovački kupci u susretu sa „Bingom“

Posljednja, 43. sjednica OV u dosadašnjem sastavu

USPJEŠNO OKONČAN MANDAT!

Nakon nepune četiri godine zajedničkog rada i odlučivanja o pitanjima važnim za svakodnevni život u našoj opštini i za njen razvoj, članovi Opštinskog vijeća održali su, 26. septembra, posljednju, 43. sjednicu u ovom sastavu.

Nakon ustaljenog utvrđivanja prisustva vijećnika, usvajanja dnevnog reda od 12 tačaka i dvije tačke dopune, uslijedilo je i usvajanje Izvoda iz zapisnika 42. redovne sjednice.

Donesene su sljedeće odluke:

- Odluka o načinu i uslovima raspolaganja nekretninama u vlasništvu Opštine, koje se nalaze u katastarskoj opštini Petrovac-Gorinčani
- Odluka o promjeni uknjižbe nepokretnosti vakuf-mezarja „Didovići“ u korist-vlasništvo Medžlisa Islamske zajednice.
- Odluka o izmjenama i dopunama Odluke o budžetu Opštine za 2016. godinu (Rebalans budžeta).
- Odluka o davanju saglasnosti na lokaciju za izgradnju zgrade sa 20 stambenih jedinica
- Odluka o davanju saglasnosti za lokaciju spomenika Petrovačkih velikana
- Odluka o utvrđivanju vrijednosti boda, u visini 0,006 KM, za obračun komunalne naknade u 2017. godini

Vijećnici su primili k znanju „Informaciju o kvaliteti vode za piće na području Opštine“ i „Informaciju o održavanju gradskog vodovoda“, koje je podnio Duško Bosnić, direktor JP „Komunalno“

Nakon što je šef Službe za stambeno komunalnu djelatnost, vodoprivredu i zaštitu okoliša, Nataša Kecman, obrazložila „Izveštaj o stanju lokalnih kategorisanih i nekategorisanih puteva na području Opštine, sa planom popravke i sanacija“, izvještaj je primljen k znanju, uz obavezu Službe da redovito održava sastanke sa predstavnicima mjesnih zajednica, kako bi se blagovremeno ostvarivali sljedeći ciljevi i zadaci: a) Zajedničko utvrđivanje pravaca prioritarnog održavanja; b) Veće angažovanje lokalnog stanovništva na razastiranju nasipnog materijala po manjim udarnim rupama (jer su ograničena sredstva planirana opštinskim budžetom); c) Saniranje putnih pravaca koji vode do mliječnih i drugih farmi.

Usvojeni su i sljedeći prijedlozi:

- Prijedlog rješenja u vezi izgradnje garaža u Ulici Skendera Kulenovića
- Prijedlog dopune Programa javne higijene za 2016. godinu
- Prijedlog dopune Plana ljetnog održavanja puteva za 2016. godinu.

OPŠTINA IZNIJELA SVOJE PRIJEDLOGE

Javna rasprava o Nacrtu Zakona o izmjenama i dopunama Zakona o šumama Unsko-sanskog kantona održana je 9. septembra u Bihaću, u sali Skupštine USK. Bilo bi logično da je rasprava održana u našem gradu, jer je i pokrenuta presudom koju je na žalbu naše Opštine donio Ustavni sudu FBiH; međutim, iz Kantona su odgovorili da je „*već ranije određen termin za održavanje javne rasprave*“.

Na početku rasprave, prisutnima se obratio kantonalni ministar Ministarstva poljoprivrede, vodoprivrede i šumarstva Dragan Polimanac, ističući da je povod izmjenama i dopunama Zakona o šumama USK, upravo Presuda Ustavnog suda od 12. januara 2016. godine, kojom je utvrđeno da je Zakonom o šumama USK povrijeđeno pravo naše Opštine na lokalnu samoupravu, te naloženo Skupštini USK da osporene odredbe uskladi u roku od 6 mjeseci.

Ministar je istaknuo da će primjedbe na Nacrt Zakona Ministarstvo pažljivo cijeniti, te iz tog razloga pozvao sve učesnike da diskutuju u što većem broju. Za riječ se među prvima javio načelnik Zlatko Hujčić, ističući važnost Presude. Naveo je da naša Opština insistira da se prihvate sljedeći prijedlozi:

1. Naknada za korištenje državnih šuma iz člana 53. ovog zakona se određuje i uplaćuje u sljedećim iznosima:

- a) 5 % na poseban račun Budžeta Kantona i
- b) 10 % na namjenski račun jedinice lokalne samouprave na čijoj teritoriji se ostvaruje prihod.

te da se naknada iz stava 1. ovog člana za tekuću godinu uplaćuje po plaćenju fakturi od strane korisnika šuma.

Odnosno da visina naknade za korištenje državnih šuma iznosi 15 % od prihoda utvrđenog na osnovu ostvarene godišnje količine sječe šumskih drvnih sortimenata računajući cijenu drveta na panju u skladu sa cjenovnikom ostvarenog prihoda od prodaje nedrvnih šumskih proizvoda. Ovaj organ predlaže, kao moguće zakonsko rješenje i alternativu ovom članu koja glasi:

„ Visina naknade za korištenje državnih šuma iznosi 5% prodajne vrijednosti koju ostvari korisnik šuma, te da se plaća po realizovanoj fakturi“.

2. Da se promijeni dosadašnja praksa davanja mišljenja jedinice lokalne samouprave na godišnji plan realizacije šumsko privredne osnove, jer nije u skladu sa navedenim članom Evropske povelje, jer mišljenje lokalne zajednice, prema sadašnjoj praksi Šumsko privrednog društva, je potpuno beznačajno budući da zadnje 3 godine ova jedinica lokalne samouprave daje negativno mišljenje na Plan gospodarenja šumama, što je korisnik šuma u potpunosti ignorisao.

Opština daje saglasnost na godišnji plan realizacije šumsko privredne osnove, a ne mišljenje, kako je propisano u dosadašnjem Zakonu.

3. Veća zaštita izvorišta i vodozaštitnih zona, kako općina Bosanski Petrovac, u dogledno vrijeme ne bi ostala bez još jednog resursa neophodnog za život i

4. Da se raspodjela dobiti koju ostvari ŠPD na kantonalnoj razini raspodjeljuje lokalnim zajednicama proporcionalno ukupnoj sječivoj masi drveta koja se ostvari na teritoriji lokalne zajednice.

Sve primjedbe, uz detaljno obrazloženje kao i oslanjanje na odredbe presude, načelnik je dostavio u pisanoj formi u toku Javne rasprave, dostavljajući i Elaborat pod nazivom *Potencijali šumskih resursa u okviru jedinice lokalne samouprave Bosanski Petrovac*, urađen za potrebe dokazivanja opravdanosti zahtjeva Opštine Bosanski Petrovac upućenih u cilju ostvarivanja većeg prava na gazdovanje šumom i ostvarivanja prihoda od šuma.

Načelnik Hujčić je na kraju svog izlaganja pozdravio namjeru Ministarstva da implementira presudu Ustavnog suda, te još jednom ponovio da ukoliko Ministarstvo ne uvrsti prijedloge Opštine Bosanski Petrovac i ne ugradi iste u Nacrt Izmjene i dopune Zakona o šumama USK, ova jedinica lokalne samouprave će biti primorana da zaštitu zakonitosti i pravnu zaštitu ponovo potraži i ostvari pred Ustavnim sudom FBiH.

Predstavljanje projekata „Alterenergy“

USPJEŠNA PRIMJENA OBNOVLJIVE ENERGIJE U NAŠEM GRADU

Ugradnja toplotne izolacije na podove i stropove, te zamjena vanjske stolarije na zgradi Opštine, regulacija sistema grijanja, zamjena postojećih svjetiljki u javnoj rasvjeti... sve su to projekti „Alterenergy“, koji su uspješno provedeni u našem gradu • U „demonstracionoj akciji“ aktivno su sudjelovali oni kojima pripada budućnost i obnovljiva energija – učenici OŠ „Ahmet Hromadžić“!

U gradskoj vijećnici su 22. septembra predstavljeni projekti, vrijednosti 200.000 KM, koji su uspješno provedeni u našem gradu, u saradnji sa partnerom „Alterenergy“. „Demonstracione akcije“, kako glasi radni naslov ovog predstavljanja i projekata „Alterenergy“, dale su očekivane rezultate u našem gradu: uspješno je ugrađena toplotna izolacija na podovima i stropovima, te zamijenjena vanjska stolarija na zgradi Opštine, regulisan je sistem grijanja, na ulicama su zamijenjene klasične sijalice jeftinijim i trajnijim LED svjetiljkama... Osim što je na taj način ostvarena ušteda energije,

poboljšani su uslovi rada u općinskoj zgradi, a i gradske ulice su bolje i ljepše osvijetljene.

Jedan od partnera za strateške projekte „Alterenergy“, koji se realizuju u okviru IPA Jadranskog programa prekogranične saradnje, jest Ministarstvo vanjske trgovine i ekonomskih odnosa BiH. Putem projekata „Alterenergy“, Ministarstvo provodi aktivnosti usmjerene na širenje svijesti o obnovljivim izvorima energije... S tim u vezi, za lokalnu administraciju i tehničke eksperte priređuju se obrazovni skupovi, u koje spada i izrada akcionog plana za održivo

upravljanje energijom (SEAP). Osim u našem gradu, neki pilot-projekti u oblasti obnovljive energije i energetske efikasnosti na nivou BiH provedeni su i u Čajniču.

Doc dr. sc. Admir Softić, pomoćnik ministra, iskazao je zahvalnost za dobru saradnju sa našom Opštinom, i najavio da će ona biti nastavljena. Zadovoljstvo i zahvalnost za provođenje ovih važnih projekata u našem gradu zauzvrat je izrazio i načelnik Zlatko Hujčić.

Budući da se radi o korišćenju prirodnih izvora energije, za koje se može reći da predstavljaju značajan prirodni potencijal u našem kraju – ali da je primjena tek u početnoj fazi – vrijedno je kazati



Učenici Osnovne škole na predstavljanju projekta Alterenergy

da su „demonstracionoj akciji“ aktivno prisustvovali i učenici OŠ „Ahmet Hromadžić“, sa svojim nastavnicima i direktoricom Mujesinom Kavaz! Pred njima je budućnost – pred njima je primjena takvih projekata! Zahvalnicu za dobru saradnju, koju je direktorica Kavaz uručila pomoćniku ministra Softiću, predstavlja svojevrsni amanet naših osnovaca pred budućnošću!

Uz to, učenici su predstavili recitaciju o svom gradu, čiji je sadržaj upravo posvećen našim bogatstvima, ljudskim i prirodnim. Nije im ostao dužan načelnik Hujčić, povjeravajući im budućnost rodnog nam grada: obradovao ih je lijepim poklonima-podsjetnicima za budućnost!



Predstavnici Ministarstva na prijemu kod načelnika Hujčića

NAŠEM GRADU 14.665 KM IZ EKOLOŠKIH NAKNADA

Radi se o kantonalnim sredstvima koja uplaćuju pravne i fizičke osobe pri registraciji motornih vozila

U Vladi Unsko-sanskog kantona, 5. septembra, upriličeno je potpisivanje ugovora između Ministarstva za građenje, prostorno uređenje i zaštitu okoliša Unsko-sanskog kantona i naše Opštine, koji se odnosi na dodjelu sredstava iz ekoloških naknada za 2016. godinu.

Radi se o sredstvima iz tzv. ekoloških naknada, dakle o sredstvima koja uplaćuju pravne i fizičke osobe pri registraciji motornih vozila.

Prema Programu raspodjele namjenskih sredstava Ministarstva, a u skladu sa brojem registrovanih vozila, našoj Opštini je pripalo 14.665 KM. Dobivena sredstva biće utrošena za asfaltiranje i uređenje parkirališta u užem dijelu gradu.

Opština je do sada realizovala sedam projekata u oblasti zaštite okoliša, ukupne vrijednosti 111.565 KM. Svi projekti usmjereni su na uređenje i očuvanje gradske infrastrukture, u cilju poboljšanja životnih uslova u našem gradu.

Povodom Kurban-bajrama

PREBAJRAMSKI PRIJEM

Načelnik Zlatko Hujčić priredio prijem za predstavnike Medžlisa IZ

Povodom Kurban-bajrama, načelnik Zlatko Hujčić je 9. septembra priredio prijem za predstavnike petrovačkog medžlisa Islamske zajednice, kojem su prisustvovali glavni imam Mirzet ef. Spahić i džematski imami Alem ef. Jaganjac (Srednji Bišćani), Rašid ef. Hušidić (Donji Bišćani), Irfan ef. Aldžić (Rašinovac) i Halid ef. Babić (Bjelaj).

Predstavnici medžlisa su se pohvalno izrazili o ostvarenoj suradnji vjerskih zajednica i opštinske administracije. Rezultati dobre suradnje vide se u brojnim realizovanim projektima od značaja za muslimanske vjernike, među kojima se ističe uspješno rješenje dugogodišnjeg problema u vezi muslimanskog mezarja.

Načelnik i imami su se složili kako uvijek ima prostora za napredak i kako će i u budućnosti nastaviti raditi složno na rješavanju svih pitanja od važnosti za multietnički karakter naše Opštine. Tako će se na najbolji, životan način, promovirati vrijednosti tolerancije i suživota.

Ispraćajući goste, načelnik Hujčić im se zahvalio na posjeti i pozivu na svečanu Bajramsku akademiju.

SVEČANA AKADEMIJA

Povodom Kurban-bajrama, u Domu kulture je 11. septembra upriličena Bajramska akademija. Svečanost je počela učenjem odlomka iz Kur'ana, koji je proučio Irfan-ef. Aldžić, imam u džematu Rašinovac.

Kurban-bajram, ili Hadži-bajram, najznačajniji je islamski praznik, blagdan prinošenja žrtve Allahu. Muslimani širom svijeta klanjem kurbana iskazuju bogobožnost, ljubav i spremnost na svaku žrtvu pred Allahom dž.š. Kurban znači približiti se onome ko nam daje. O vrijednostima i propisima vezano za Kurban-bajram govorili su predsjednik petrovačkog medžlisa Mithad Hidić i glavni imam Mirzet-ef. Spahić.

Vjernici, kojima to životni uslovi dozvoljavaju, posjećuju najveće muslimansko svetište u

Meki, K'abu, i tako obavljaju hadž, jednu od pet temeljnih dužnosti muslimana. „U ime Allaha dužan je hodočastiti Kabu, svaki onaj koji je u mogućnosti...“ (Alu-Imran, 29. ajet). Prve četiri dužnosti: 1. „Svjedočenje da nema boga osim Allaha“; 2. „Obavljanje namaza – molitve“; 3. „Davanje zekata“, tj. udjeljivanje određenog dijela imovine osobama u oskudici; 4. „Post mjeseca ramazana“.

Akademiji je prisustvovao i načelnik Zlatko Hujčić, sa nekoliko članova Općinskog vijeća.

U nastavku programa, prisutni su uživali u izvedbi ilahija hora „Mali bulbuli“, pod vodstvom Zemire Mašić. Voditeljica programa je bila Melita Šehić.

Smoljana njeguje tradiciju

DANI BASE I KROMPIRA

Prepoznatljiva i popularna, time s nestrpljenjem očekivana, smoljanska godišnja priredba „Dani base i krompira“ održana je u ovom podgrmečkom selu 24. septembra, uz učešće velikog broja individualnih petrovačkih proizvođača dobrih sireva i jedrih krompira, među kojima posebno mjesto zauzimaju proizvođači base, autohtonog sira koji se proizvodi samo na našim prostorima.

Zahvaljujući dobroj, uistinu motivirajućoj organizaciji, ovogodišnji „Dani base i krompira“ – jubilarni, što bi rekli, jer deseti po redu – bili su posjećeniji više nego ikada. Zapravo, „Dani“ svake godine poprimaju sve masovniji karakter, zahvaljujući primjerno aktivnoj Mjesnoj zajednici, kojoj je na čelu Marinko Mrđa, aktivan i kao opštinski vijećnik.

I organizatorima i izlagačima želja i cilj ogledaju se u nastojanju da se sačuva ovdašnji prirodni „brend“ – čuveni smoljanski krompir, i da se sačuvaju od zaborava promovišu domaća kuhinja i vazdušnobanjski etno-eko-turizam.

Jedna od bitnih karakteristika ove gastronomske smotre jeste i domaćinska atmosfera među gostima, te običaj da se svi proizvodi izloženi na štandovima mogu kušati „do mile volje“. Vrijedne domaćice su na svojim štandovima poredale pite, kolačiće i druga jela iz svoje kuhinjske svakodnevnice. To što za smoljanske domaćice znači naslijeđenu, vjekovnu svakodnevnicu, to u savremenom svijetu predstavlja specijalitete, koji se zacijelo mogu „brendirati“, tj. zaštititi u evropskim i svjetskim razmjerama, kao smoljanska autorsko-kulinarska kreacija.

U takmičarskom dijelu, stručni žiri je odlučio ko je najbolji od najboljih: prvo mjesto za najbolji sirac osvojila je Vesna Rodić, za basu Aleksandra Kecman, a za kajmak prvo mjesto su dijelile Milka Mrđa i Savka Branković! Priznanje za najveći krompir (800 gr.) pripalo je Mići Stojanoviću! Najljepši štand imala je Rada Marjanović.

O jedinstvenoj vrijednosti smoljanske godišnje smotre, posvećene očuvanju vjekovnog načina življenja u oštrim uslovima grmečke klime, službenu društvenu podršku je iskazao načelnik Zlatko Hujčić:

„Mi na ovu manifestaciju gledamo kao na nešto prirodno, kao javni prikaz vjekovnog porodičnog načina življenja, s ciljem očuvanja od zaborava. Moramo se posvetiti više ovome, ne smijemo izgubiti temelje i korijene! Mislim da ste, i da smo, na pravom putu!“

„Dani base i krompira“ okončani su tradicionalnim seljačkim ručkom, kada su se na meniju, uz slavljeničke basu i krompir, našli smoljanska šljiva i kuhani kupus sa mesom – vjekovni domaći specijaliteti koji se takođe mogu „brendirati“!

Ima još jedna, zavičajna dimenzija „base i krompira“, zavičajni magnet jela koja su othranila hiljade i hiljade Smoljanaca, koje je život odveo od rodnog ognjišta: za „Dane base i krompira“ okupe se u svom zavičaju brojni Smoljanci, sa sve četiri strane svijeta, najviše iz Banje Luke, Beograda, Novog Sada i drugih dijelova Vojvodine...

EKOBIS – GLAS UNE!

Centar za kulturu i obrazovanje predstavio petrovačke turističke potencijale

Na ovogodišnjem, 14. međunarodnom ekološkom sajmu „Ekobis 2016.“, koji je održan 8-11. septembra u Bihaću, petrovački Centar za kulturu i obrazovanje predstavio je dio našeg turističkog potencijala: štand Centra su krasili ćilimi sa prepoznatljivim „Bolića kolom“, med i čajevi sa mednih i ljekovitih polja, domaća šljivovica, basa i druge vrste autohtonih sireva...

Posjetitelji su mogli da vide i brošure o poslovnoj zoni „Gorinčani“ i o Ćilimari, a najveći interes su pokazali upravo za ćilime, svjedoke stoljetne porodične tradicije ukrasnog tkanja čuvenih „petrovačkih ćilima“.

Ekobis je manifestacija ekološkog turizma, ekološke industrije i općenito ekologije, čiji je stalni organizator

Privredna komora USK. Pokrenut je 2003. godine, s ciljem očuvanja, razvoja i promocije prirodnih ljepota unskog područja, odnosno zapadnih krajeva BiH. Uz raznovrsnu komercijalnu sajamsku ponudu, Ekobis posvećuje znatnu pažnju promociji ekološkog znanja i svijesti.

Uz novost, da je Ekobis održan na novoj lokaciji, u Sportsko-rekreacijskom centru „Luke“, novost je bila i sama tema sajma: „Opstanak“. Drugim riječima – „razvojem za opstanak“, usmjeren najviše na stvaranje uslova koji će omogućiti mladima da mogu živjeti od svog rada, kao svoji na svom.

Na sajmu se predstavilo oko 200 individualnih i kolektivnih izlagača, iz osam zemalja.



Šarenilo bosanskopetrovačkog bogatstva



Izrezbareni starinski namještaj (inače je dio stalne postave u muzeju Jovan Bijelić) na ćilimu

Počela nova školska godina

ŠKOLSKE TORBE ZA PRVAČIĆE, KOMPLETI KNJIGA ZA SVAKOG UČENIKA!

Redovna nastava za osnovnu i srednju školu na području naše Opštine počela je 1. septembra. Prvog dana nastave učenici su uglavnom upoznati sa rasporedom sati i udžbenicima koje će koristiti tokom školske godine.

Kako bi prvačićima poželjeli sretan početak nastave, i drag prvi susret sa školom, za njih je organizovana svečana priredba. Tom prilikom je govorila direktorica škole, Mujesira Kavaz, koja je istakla zadovoljstvo zbog dolaska mališana i zaželjela im uspješan početak nove etape u njihovim životima! Direktorica je uputila riječi zahvalnosti svima koji su potpomogli učenicima, da bolje prate i savladavaju školsko gradivo: Ministarstvu obrazovanja, nauke, kulture i sporta USK, koje je obezbijedilo komplet udžbenika svakom učeniku, a petrovačkoj Opštini, privrednicima i ostalim sponzorima, koji su potpomogli da svaki prvačić dobije školsku torbu sa priborom!

Načelnik Zlatko Hujic prisjetio se svog prvog dana u školi, ističući zadovoljstvo što će se i današnji učenici u budućnosti prisjećati ovogodišnjeg 1. septembra, a neki će možda i po završetku školovanja čuvati poklone koje su danas dobili!

Roditelji, nastavnici, djeca i svi prisutni uživali su u nastupima učenika drugog i trećeg razreda. Plesali su, recitovali, pjevali, poželjevši prvačićima mnogo lijepih trenutaka i mnogo dobrih ocjena, i da školu prihvate kao svoju drugu kuću. Ovdje se nauči čitati, pisati i računati, ali se i steknu prijateljstva, koja ponekad traju čitavog života.

U Osnovnu školu upisani su Rejhana Aličković, Anes Bajraktarević, Munira Begović, Belma Bilalić, Lazar Bogojević, Adin Bolić, Ahmet Bulić, Boško Drljača, Sara Družić, Stefan Dukić, Nives Džigum, Dragan Grahovac, Adelisa Gutlić, Ajla Hrkić, Džanan Hrnčić, Alen Hrnjić, Mirzad Hodžić, Tarik Husetić, Ammar Ibrahimović, Miloš Jeličić, Ajdin Kartal, Mirza Kartal, Irma Kozlica, Anamarija Kecman, Jovana Kerkez, Aleksandar Latinović, Danijela Latinović, Jovan Mandić, Jelena Marjanović, Ajdin Mehić, Elmira Mehmedović, Ahmet Meštrovac, Ana Mitrić, Munira Mujanović, Dalila Muratović, Smail Nadarević, Haris Nuhanović, Rejhana Orlić, Tarik Porić, Salem Suljić, Samed Suljić, Marko Šljivar, Adrijana Šobot, Hanan Ugorak, Sabina Velić i Lamia Vuković.



Publika na priredbi u čast dolaska nove generacije prvaka



Učenički način dobrodošlice đacima prvacima: plesom



..... glumom



.... recitacijama



...topljim riječima



....pjevanjem

U Dječijem vrtiću i na ulicama...

Jesenja svečanost

Nesvakidašnje šeširiće, jesenje plaštove, raznobojne maske raznog voća, mališani Dječijeg vrtića su pokazali 21. septembra u sklopu tradicionalne manifestacije „Pozdrav jeseni“.

Za ovu priliku hodnici vrtića specijalno su ukrašeni dječijim radovima od lišća, voća i povrća. Nakon priprema u vrtiću, „šarena povorka“ je krenula ulicama našeg grada. Uz smijeh i graju okupili su roditelje, ali i ostale građane,

koji su oduševljeno promatrali veseli karneval. Obučeni u odore jesenjih nijansi, pjesmama su iskazivali dobrodošlicu i zahvalnost godišnjem dobu, koje im daruje voće i povrće.

Direktorica vrtića, Zlata Balić, kazala je da se ovakvim aktivnostima pruža mogućnost najmlađima da pokažu šta znaju o ovom godišnjem dobu, da iskažu svoju kreativnost i sposobnost, a istovremeno da upoznaju i nauče sve ono što jesen sa sobom donosi.



Veseli mališani sa svojim tetama i direktoricom



Šarena povorka je krenula gradom...

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski Petrovac od 15:00-17:00, svakim danom na 90.9 MHz fm